

HITZ BITAN

AHT. Larunbateko manifestaziora deitu dute

Garraio ereduari buruzko eztabaida «lasaia» egiteko eskatu du Batasunak

Gorane Agirre | BILBO

Euskal Herriak behar duen garraio ereduari buruz —garraio azpiegiturez eta horien arteko osagarritasunaz— eztabaida «lasaia eta zabala» egitea eskatu zuen Batasunak, atzo.

Iñaki Antiguedad Batasunako Bizkaiko Mahaiaren Lurralde Antolaketarako arduradunak gogor salatu zuen garraio azpiegituren alorrean egun dagoen «eromena edo nahasmen itzela» eta horrek sortzen dituen ondoriak. Besteak beste, «azpiegitura berriek zaharrak ordezkatu beharrean, guztiak pilatzea» eta Eusko Jaurlaritzaren eta Diputazioetako Garraio sailen arteko «koordinazio eza».

Garraio alorreko «nahasmen» horren adibide giza Bilboko portutik merkantziak ateratzeko dauden proposamenak

aipatu zituen Antiguedadek. Bere hitzetan, «Bizkaiko Diputazioak A-8 autopistaren ordezkoa izango den Super-8a defendatzen du, baina Jaurlaritzak berak trenbidea aldarrikatzen du».

Garraio azpiegitura proiektuei dagokienez, gehitu zuen, «EAJ eta EAren barruan Afganistanen baino tribu gehiago daude eta bakoitzak bereari eusten dio».

Bestalde, jasagarritasun kontzeptuaz politikariek egiten duten erabilera «okerra» ere salatu zuen Antiguedadek: «Edo gezurretan ari dira garraio jasagarriaz hitz egiten dutenean edo ez dakite kontzeptu horrek zer esan nahi duen».

AHTren proiektua «nahasmen» horren barruan kokatu zuen Eusebio Lasa Mahai Nazionalako Politika Sozialera-



JOSU ETXEBARRIOSTE

Eusebio Lasa, Iñaki Antiguedad eta Ibon Arbulu, AHTari buruz iaz eskaintako prentsaurreko batean.

ko arduradunak, «nahi eta ezin delako proiektu horren irizpidea». Ildo horretan, Eusko Jaurlaritzak proiektu hori «lehenbailehen» egiteko borondate politikoa erakutsi badu ere, asmo hori gauzatzeko «zailtasun ugari» dituela azaldu zuen.

Trenbide proiektu hori gara-

tzeko Eusko Jaurlaritzak finantzabide arazoak dituela adierazi zuen Lasak. Eta horren adibide bezala, AHTaren egitasmorako Jaurlaritzaren 2002ko aurrekontuetan 160 milioi pezeta (milioi bat euro inguru) eta Madrilgo Gobernuarenean 500 milioi baino gutxiago aurreikusten direla azaldu zuen.

Era berean, zailtasunen artean, Euskal Herria mailan egitasmo horren kontrako indar metaketa «gero eta sendoa» aipatu zuen Mahai naizoneko kideak. Ildo horretan, AHT Gelditu! Elkarlana plataformak, larunbatean, Arrasaten antolatu duen manifestazioan parte hartzeko deia egin zuen.

INGURUMENA

Ingurumen hezkuntza zentroen gida kaleratu dute Gipuzkoako Foru Aldundiak eta BAM distrituak

Baiona-Donostia Eurohirian eta inguruan dauden ingurumen hezkuntzarako zentroen gida kaleratu dute Gipuzkoako Foru Aldundiak eta Baiona-Angelu-Miarritze hiri elkarteak. Guztira 40 zentro biltzen ditu Mugaz Gaiendiko Ingurumen Tailerrak landutako katalogoak; 95 orri ditu eta etxalde-eskolak, interpretazio zentroak eta museoak agertzen dira bertan. Ez da, baina, Baiona-Donostia Eurohiria gidak hartzen duen zonalde bakarra: Gipuzkoa osoa, Ipar Euskal Herria eta Landesetako hegoaldea hartzen ditu bere baitan.

EUSKARA

Orioko Udaleko Euskara Zerbitzuak jatetxeetako kartak euskaratzeko ekimena abiatu du

Orioko Udaleko Euskara Zerbitzuak ekimena abiatu du, herriko jatetxeetako menu-kartak euskaratzeko, Euskara Merkataritzara kanpainaren barruan. Euroaren etorrerarekin jatetxeetan kartak aldatu beharko dituztela aprobe txatu nahi izan du Udalak. Jate-txeetara gutun bana igorriko dute, karta euskaratzeko gonbita eginez eta horretarako beharrezko laguntza eskainiz.



TXEMA FERNANDEZ / EFE

DROGA TRAFIKOA

115 kilo kokaina atzeman ditu Guardia Zibilak Kolonbiatik Santurtzira etorritako itsasontzi batean

Guardia Zibilak 115 kilo kokaina atzeman zituen, azaroaren 29an, Santurtziko portura iritsitako Kolonbiako itsasontzi batean gordeta, Espainiako Gobernuak Bizkaian duen Ordezkaritza-ordetik atzo jakinarazi zuten. Itsasontzia Cartagenatik zetorren, eta behin baino gehiagotan egin izan du Kolonbiatik Euskal Herrirako bidea. Ikerketa sotoetan hasi zuten, eta han aurkitu drogak miaketa sakonago bat egitera bultzatu zituen. Hala, kokaina zuten bederatzi motxila aurkitu zituzten. Droga purutasun handikoa zen, eta Guardia Zibilaren arabera, 1.000 milioi pezetako balioa izango zuen merkatuan (6 milioi euro).

BOROA

Bizkaiko Foru Aldundiak 675 milioi pezeta emango ditu Boroako industrialdea eraikitzeko

Bizkaiko Foru Aldundiak 675 milioi pezetako diru partida onartu du, Zornotzako Boroa auzoan egingo den industrialdea eraikitzeko (4 milioi euro inguru). Eraikuntza lanen esleipena, hain zuzen ere, hilabete honetan bertan egingo dute. Aipatutako industriagunean da eraikitzekoa zentral termikoa, eta atzo onartu laguntzak proiektua aurrera doala erakusten du.

DROGA MENPEKOTASUNA

Azkunak Hontzaren inaugurazioan gertatutakoa kritikatu eta «zentzuz jokatzeari» eskatu die auzokideei

Iñaki Azkuna Bilboko alkateak Zamakola auzoko bizilagunen herenegungo jokabidea kritikatu zuen, atzo, eta «zentzuz jokatzeko» eskatu zien. Horrez gain, auzokideen jarrera ikusita, Azkunak adierazi zuen poliziak bermatuko duela auzoko segurtasuna; eta gogorarazi zuen auzokideek beraiek egin diotela uko aterpearen segimendua egingo zuen batzordean partze hartze-ari. Zamakolako bizilagunen artean toxikomanoentzako Hontza aterpeak eragin duen ondoreza eta erreakzioa «guztiz neurritz kanpokoak» dela ere esan zuen Bilboko alkateak.

OSASUNA

Tumoreak eta sistema kardiobaskularreko gaitzak dira Bizkaia, Gipuzkoa eta Arabako heriotza kausa nagusia

Tumoreak izan ziren 2001. urteko bigarren hiruhilabetekoan Bizkaian, Gipuzkoan eta Araban gertatutako heriotzen eragile nagusiak, Eustatek atzo jakitera eman zuen. Horrekin batera, eta ia kopuru berdintsuan sistema kardiobaskularreko gaitzak ere heriotza eragile garrantzitsu dira. Apirila, maiatza eta ekainean 1.324 pertsona hil ziren tumoreen eraginez; eta 1.304 lagun zirkulazio sistemaren gaixotasunen baten eraginez. Hain zuzen ere, aurtengo lehen hiruhilabetekoan gehiago izan ziren gaixotasun kardiobaskularren ondorioz hildakoak. Arnasketa arazoak dira gaixotasun heriotza eragileen artean hirugarren lekua hartzen dutenak.

HEZKUNTZA

Jaurlaritzak 301 milioi pezeta emango ditu Partaide eta Eusko Ikastola Batzaren 'Eleanitz' plana betetzeko

Eusko Jaurlaritzak 301 milioi pezetako diru saila onartu zuen, atzo, Partaide eta Eusko Ikastola Batza elkarteetan ordezkatuta dauden ikastolei emateko (1,8 milioi euro). Diru hori 2001-2002 ikasturtean Eleanitz programaren aplikazioa finantzatzera zuzenduko dute aipatutako ikastolek. Jaurlaritzako Hezkuntza Sailak eta aipatu ikastola elkarteek sinatutako hitzarmenaren bidez, haur txikienei ingelesa irakasteak ekartzen dituen kostuen zati bat betetzea da laguntzaren helburua.